

Sang Presiden Thomas S. Monson



Kisakis en Koluhla

“**A**tail pwukoah iei kitail en maiaudahsang nan atail luwet akan oh ahniki kehlail, sang ni sohte pweidahkan oh nantieng en kin mie pweida,” Presiden Thomas S. Monson padahngkier. “Atail pwukoah iei kitail en nantieng wen atail kak koaros. Iei ehu sapwellimen Koht kisakis laud ong kitail iei kitail en kin pereniki nantieng ansou koaros pwe kapwul en dehr kin mie.”¹

Kitail kin kalapw tapihkihda pahr kapw ki koasondi kan me kitail men wia me pahn kak en weksang pahr teio. Kitail pilada kitail en kamwahuiala, wekila, oh pil ehu nantieng. Mwein me keieu kesempwal me kitail pahn kak wia pwe kitail en nantieng iei sang ni dahme Presiden Monson kin kahdaniki “kisakis en koluhla.”²

Sang ni iren padahk kan me e kin padahngkier sang ni ansou me e wiahla Presiden en Mwomwohdiso, Presiden Monson kaweidkin kitail en “alehda tomwpen intahn Kraiss pwe kitail en kak ale mahkepen dipatail kan oh atail mongiong kan en kak mwakelekelda.”³

Manaman en Koluhla

“Kitail koaros wiadahr pilipil sapwung kan. Ma kitail saikinte kapwungala pilipil sapwung pwukat, I inoukieng kumwail me mie wiepe ehu me kitail kak wia. Wiepe wet kin kahdaniki koluhla. I peki rehmwail en kapwungala amwail sapwung kan. Atail Sounkomouro pwoula pwe en kak kasalehieng komwi oh ngei duwen kisakis en kapai wet. Itarete ahl wet e sohte mengei, ahpw inouo inenen mehlel: ‘Mehnda ma kumwail weitahkilahr dipamwail kan, apw I pahn kamwakeleikumwailda duwehla sinoh’ [Aiseia 1:18]. ‘Oh ngei Kauno sohte pahn manokeikumwaila’ [D&C 58:42]. Dehr kapwahlehla amwail mour soutik. Ma kumwail dipadahr, a kumwail nantieng pwuaralahng nan ahlo ansouohte, ni ansouohte

kumwail pahn kak diar meleilei oh popohl me pahn kodohng kumwail sang ni manaman en mahkepen dipamwail kan.”⁴

Pwuralahng Pohn Ahlo

“Mendahte ah inenen kesempwal kitail en kin wiahda pilipil mwahu, e pahn kin mie ekei pak me kitail pahn kin wiahda pilipil sapwung. Kisakis en koluhla me Sounkomouro kiheng kitail kin kahrehda atail kak kapwungala atail mour pwe kitail en kak pwurala nan ahl me pahn kahlua kitail ong nan dake keieu laud me kitail raparapahki iei celestel.”⁵

Ahl en Pwurala

“Ma mie nan pwungamwail me dipwekelekel nan amwail seilok en mour, I inoukieng kumwail me mie ahl de wiepe en kapwureikumwaildo. Wiepe wet kin kahdaniki koluhla. Mendahte ahlo ah apwal, ahpw iei ahl wet me pahn kak komourkumwaila. Dahme pahn kak en kesempwal sang amwail doadoahk laud kan? I peki rehmwail en pilada wasaht oh ansou wet en alehda wiepeh kan me konehng en wiawi oh koluhla mehlel. Ni amwail pahn kin mwadangele koluhla, ansouohte kumwail pahn alehdi pepehm en meleilei oh inou me Aiseia mahsaniero [kilang Aiseia 1:18].”⁶

Aramas kin kak Wekila

“Kitail anahne tamataman me aramas kin kak wekila. Irail kak pwilikihdi mwekid suwed kan. Irail kak koluhkihla oh soikala sapwung kan. Irail kak warohng en kolokol priesthood. Oh irail kak papah Kauno ni soh peikasal.”⁷

Pwurehng Mwakelekelda

“Ma mie mehkot me rirla nan amwail mour, mie wasa me ritidahr ohng kumwail en pidohi ie. Likisang me suwed

akan. Kosoieng amw pisop. Sohte lipilipl soangen kahpwal da, e pahn kak epwela sang ni idawehn pwungin wiepen koluhla. Kumwail pahn kak pwurehng mwakelekelda.”⁸

En Sounkomouro Pwukoah Kesempwal

“Me keieu kesempwal nan pilahn [en komouro] iei atail Sounkomour, Sises Krai. Ma sohte Sapwellime tomw en tohnmeteio, kitail koaros pahn salongala. E sohte itar, ahpw ihte, kitail en kamehlele Ih oh Sapwellime doadoahk me E ketin wia pohn sampah. Kitail anahne doadoahk oh esehla, rapahki oh kapakap, koluhla oh nantieng en mwahusang rahnteio. Kitail anahne esehla Sapwellimen Koht kosonned akan oh momourki. Kitail anahne alehdi Sapwellime tiahk sarawih kan. Sang ni wiewia mepwukat kitail pahn esehla me mehlelo, duwen peren poatoapoat.”⁹

IREN SAWAS AKAN

1. “The Will Within,” *Ensign*, Mei 1987, 68.
2. “Pilipil Kan,” *Liahona*, Mei 2016, 86.
3. Mosiah 4:2.
4. “The Three Rs of Choice,” *Liahona*, Nopempe 2010, 69.
5. “Pilipil Kan,” 86.
6. “Keep the commandments,” *Liahona*, Nopempe. 2015, 85.
7. “See Others as They May Become,” *Liahona*, Nopempe 2012, 68.
8. “Priesthood Power,” *Liahona*, Mei 2011, 67.
9. “Ahlen Mour Kaselel ong Popohl,” *Liahona*, Nopempe 2016, 80–81.

PADAHK SANG NI MAHSEN WET

Kitail koaros sohte unsek—ihthe sang ni kisakis en koluhla me wiawihier sang ni tohnmeteio en Sises Krai me pahn kak en kamwakeleikitailda sang nan dihp oh kamwauiala atail mour. Kin taman kosoihieng irail kan me ke kin kaskuhlih duwen mwomwen atail kin “kapwungala atail mour” sang ni koluhla. Ia mwomwen arail kin karanihala Samatail Nanleng oh Sises Krai sang ni mwekid mwahu kan me irail wiadahr nan arail mour? Ke kak luke irail kan me ke kin kaskuhlih en intingihdi soahng kan me irail men wia ong nan pahr kapw wet me pahn kak sewese palingenerail kan oh me pahn mwahuieng mehn imperail, arail pwoud, de peneinei teikan pwehn kak pweida.

ME PWULOPWUL KAN

Pilada ken Koluhla

Presiden Monson kaweweh me “atail pwukoah iei kitail en maiaudahsang nan atail luwet akan oh ahniki kehlaile, sang ni sohte pweidahkan oh nantieng en kin mie pweida. Atail pwukoah iei kitail en nantieng wen atail kak koaros.” Aramas tohto nan sounpwung en Senweri kin nantieng en wiahda arail pilahn me irail

pahn song en doadoahklahng oh wiewia kan me irail pahn song en kamwauiahla: me rasoahng kin kalapw sirei, kang mwonge me mwahu ehng roson mwahu, de esehla mehkot me kapw. Sang ni pilahn pwukat ah kak seweseiuk en wekila de mwahusang met, me keieu mwahu en kak wekidkitaila iei sang ni koluhla.

Koluhla pil kin apwal ahpw e wia kisakis ehu! Sang ni atail pahn idawehn Sises Krai oh koluhkihla dipatail kan, kitail pahn kak en kekeirda oh pweida. Presiden Monson mahsanhi me, “Me keieu kesempwal nan pilahn [en komouro] iei atail Sounkomour Sises Krai. Ma sohte Sapwellime tomw en tohnmeteio, koaros pahn salongala.” Sang ni koluhla, kumwail pahn kak en mwakelekeldasang nan dipemwail kan oh kekeirda pwehn duwehla Ih.

Medewehda soahng ehu me pahn kak en kolokol uhk sang en kak duwehla Sounkomouro. E sou mwomwen ahmw koaso? Mwomwen ahmw kin apwalih kempoakepahmw kan de peneinei? Mwurin ahmw medewehda dahme ke kak kamwauiahla, kapakapehng Samatail Nanleng oh kasalehieng wen ahmw ineng en men wekidala ahmw mour. Tamataman me sang ni manaman en Sapwellime Tomwo, Sises Krai kak seweseiuk en powehdi ahmw luwet akan. Ni Presiden Monson ah padahngki me, “Kisakis en koluhla me Sounkomouro kasaledahr kak en sewesei kitail en kapwungala atail mour.”

Sang ni pilahn kan ong nan pahr kapw me pahn kak en sewesei kitail en keirda, me keieu mwahu en kak wekidkitaila iei sang ni koluhla.

Pil kilang “Eight Myths about Repentance” ni lds.org/go/1186.

SERI KAN

Koluhla iei Kisakis Ehu

Kisakis en koluhla sohte wia kisakis ehu me ke kak kilang de doahke. Ahpw e wia kisakis ehu me ke kak kehn. Met me wewehki me ni ansou me kitail kin wiahda pilipil sapwung, kitail kak koluhla oh pwurehng kehn meleilei oh peren.

Samatail Nanleng oh Sises Krai pahn kin kalapw sewesei kitail en koluhla. Maleniada ehu mahlel me pahn kin ieiang ehu ehu dakehn koluhla.

Kitail kin pehm mahk.

Kitail kapakapehng Samatail Nanleng, indahng dahme wiawihier, oh peki Sapwellime sawas en sewesei kitail en wiada pilipil mwahu mwurin met.

Kitail pehm mahk oh nantieng en wia mwahusang met.

Kitail pehm meleilei oh ese me kitail alehier mahkepen dipatail kan.



Pwoson, Peneinei, Sawas

Nantieng kin Ehuieng Ih nan Ahnsou Sohte Lipilipil, Wasa Sohte Lipilipil, ni Sohte Lipilipil

Padahk en pas pid duwen ehukipene kalohk rongamwahu. Sises kin kalohkseli ni ansou oh wasa sohte lipilil kan. Kitail kak idaweihn Sapwellime karasaras.

En “kalohk” wewehki en papah, apwalih, de sawaski en kaloale-mwahuih de kaperenda meteikan. Padahk en pas pid duwen ropirop en diarada soangen wiepe me pahn mwau ohng irail kan me kitail kin pwarek. Sises Kraiss kalohk ohng koaros—ni ansou oh wasa sohte lipilipil. E kamwengehda meh limekid, 5,000, kaloalemwahuih Mary oh Martha ni ansou me riarapwutako mehla, and padahkihong lih me mih ni pwarero Sapwellime rongamwahuo. E wia met pwehki sang ni Sapwellime limpoak mehleh.

Sang ni ideidaweihn Sapwellime karasaras, ni atail wia pwihni en padahk en pas kitail pahn esehla oh poakoahng riatail lih akan me kitail kin pwarek, tamtaman duwen limpoako me wia poahsoanpen soahng koaros me kitail kin wia. Ni ansou me kitail pahn kin kapakapi en esehla ia mwomwen atail pahn kin papah ih oh sewese kakelaihlih ah pwoson, “tohnleng kan pahn sohte kan en uhdihsang patehng[kitail].”¹

Sang ni pwihni en Relief Society nan pahr 1842 lel rahnwet, sawas-penehn kalohk en lih akan kapaia-dahr mour tohto. Me rasohng, Joan Johnson, lih sounpar 82 sohte ah pwoud, oh ienge sounpadahk en pas pwarek kempoakepahra men me sounpar 89 oh me ahniki kohwa soumwau nomwonia. Ira kak kilang me kempoakepahrau sohte anahne irahn kin pwarek te pak ehu nan sounpwung ehu, eri ira eri tapiada kin pwarek ih nan wihk koaros de kin kahl nan delepwohn.

Ohng ekei pwihni en padahk en pas akan, sang ni pekeder kisin likou de sang ni ihmeil pahn kak en wia mehn kakehlaihl ohng riatail lih akan nan sounpwungo. Kin wiahda ahnsou me mwahu en tuhpeno oh kin rong sang ni limpoak kin wia mwekid keieu kesempwal ong doadoahk en padahk en pas. Sang ni dipisou kapw en rahn pwukat oh kulok me kin kileldi en tuhpeno kin sewesei kitail en kak wia ni ahnsou sohte lipilil, wasa sohte lipilipil, oh ni soahng wiepe tohto.² Iei met me

kasalehda duwen en Sises pwukoah doadoahk en kalohk.

IREN SAWAS AKAN

1. *Teachings of Presidents of the Church: Joseph Smith* (2007), 454.
2. *Tehk Handbook 2: Administering the Church* (2010), 9.5.1.

Medewe Met

Ia mwomwen atail pahn uhdih-sang pwunpwunodiki duwen “dahme anahnepe” ong padahk en pas oh sang ni atail pahn medewehte dahme emenemen lih anahne sang rehn irail kan me kin wia padahk en pas reh?

Doadoahk en Kalohk

Pwehn dehr wia padahk pisetik, ehu ehu sounpwung peit wet pahn kin kasalehda soangsoangen iren padahk me pahn sewesei kitail en kak kalohk mwahu ong mehteikan. Ni amwail pahn kin kapakap oh rapahki ineng en wia pwukoah doadoahk wet, kumwail pahn ese duwen iren padahk sarawi oh soangen sawas da me emenemen riatail lih anahne.